



#### بطاقة الكتاب

عنوان المؤلّف: دوشــة

المؤلّف : زكريا ضاحى توفيق

التصنيف : أشعار بالعامية المصرية

رقم الإيداع : 2017-28620

عدد الصفحات: 102 صفحة

رقم الإصدار الداخلي: 34

تاريخ الإصدار الداخلي: 12 /2017 طبعة ثانية

الإشراف العام: الشاعرة سميرة محمودى

جميع حقوق الطبع والنشر محفوظة للشاعر، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من الشاعر

#### دار النيل والفرات للنشر والتوزيع

سجل تجاري: 13242

بطاقة ضريبية: 35-01-572-00031-5-2015 رقم التسجيل: 201-662-544

E-mail: alnile waalforat@yahoo.com


النيل والفرات :twitter

youtube: alnile waalforat@yahoo.com

facebook: alnile wa alforat

ماتف: 01011256943 - 01116202218 - 01202541192

الشرقية - العاشر من رمضان - مجاورة ١٣ - عقار ٢٠٤ - الدور الثاني - أمام سنتر ١٣



#### إهداء إلى ....

#### \*\*\*\*\*

- كُل زهرةِ تَفتَّحَت في بستان العلم تُداعِبُ الأمل.
  - كُلِ ضمير حَي رغم مغريات الحياة.
  - كُل قلم حُر في زمن الطَّبلِ والمِزمَار.
- كُلِ فتاة ترتدي ثوب التعفف في بحر الظلمات.
- كُلِ يتَ يم تقاطرت عَبَراتُه في بحر التَّيهِ والحِرمَان.
  - كُلِ قلب ينبض حُباً حتى يعانقَ حُضنَ السماء.
  - إلى رَوْحِ أَخي الحبيب} عَبْدَ اللَّهِ { في جَنبةِ اللَّهِ رَوْحِ أَخي الكِرَام البَرَرةِ .

#### زكريا

## بُكرَه أحلَى

ف عِزْ الضَّلْمَه والعَثْمَه ولُون مَلامِحنا إل كَاتْمَه شُعَاع النُور هَيوصَلِّي ِ ينَوَّر قَلبي بالعَافيه عاتبت الحزن بالضحكه لقتهم وقفوا إيد واحده وجابوا الفرحه تتدفى ولأن الحرن مش دايم لقيته فَجْأه راح قايم بِيدَّحْلِب وِ يتَمشَّى حَياتَكُ إنت تِرسِمْهَا

بحب الناس تِلونها ولو مُشْ لاقى تتعشى دا رَبْ الخير عنده كتير ارفع إيدك دعوه تصيبك إدعى يارب كُلمَّا تتوضى تلاقي الزرع بيخَضَّر ببركة دَعوه مأشْ أكتر حقيقي دا كُله مِتقَدَّر فبلاش تلويها وتكشر ف عز الضَّلمَه والعَتْمُه ولون ملامحنا الكاتمه شُعَاع النُور هَيوصلِّي ينور قلبي بالعافيه

## يا رَبْ

مِسيرها فِ يُوم تِتعَدِّل وتُوب الفَقر يتبَدِّل و ألاقى الضحكة حضناني ويهرَب دَمعِي فِ ثواني وتنزل مَطَرَه فُوق صَبري تِنَبِّت كُل أحلامِي مِسِيرها فِ يُوم تِتعَدّل وتُوب اِلَفقر يتبَدِّل تلاقي الخير بيندهلك كأنه قَريب ومِن أهلَك يحَلِّى كُل أيامَك

يِضَحِّي بنفسه عَلشانَك ويقطُفلَك ثِمار صَبرَك مِسيرها فِ يُوم تِتعَدِّل وتُوب الفقر يتبدِّل أكيد رَبِّك شايلَك خير بلاش تِتعب مِن التفكير يومين نِحزَن يومين نِفرَح سننابل صبري راح تطرح وتفرشلي طريقي حرير مِسيرها فِ يُوم تِتعَدّل وتُوب اِلَفقر يتبَدِّل

## وقت الشدّه

وقت الشدَّه تبان الناس تلاقى نحاس ويًا ألمَاس لِسَّه الدنيا برضه بخير مهما يكون الشر ماليها شُجَر الخير فيها كتير حُبْ الناس نعمه كبيره أهل أِخُوات صُحبَه وجيره كُنَّا زمان بتشيلنا حَصير وقت الشده تلاقى أبطال ربك عالم بالأحوال فبلاش تتعب م التفكير

كنت صغير ولاً كبير هُمًا يومين بنقضيهم المؤل والعرض هنعديهم أبدر حُب تُحصد خير ازرع كِلمه حِلوه جَميله بين الناس بنيَّه سليمه تطرح عَالَم عَقلُه كبير عَالَم عَقلُه كبير عَالَم عَقلُه كبير تلقي الدنيا فِيلم جَميل تلاقي الدنيا فِيلم جَميل تلاقي الدنيا فِيلم جَميل

# قطر الغربه

يا قَطر الغُربَة مَ تهدّي كِفايه مَطوَحَه فِينا سنين بتعبي وتودي وبتعذب أهالينا يا قطر الغُربة مَ كِفايه تِعِبنًا خَلاص وبكفَايَه دموع الحُزن بتهطِّل بتقتل كُل ضِحكَايَه شُكِيت القطر للدُنيًا تِحُوشُه عَنِّي لَو ثانيه قالتلی لِسنّه دِي بدایه

سنين عايش وبتألم قُصاد حِلمِي مَ بتكلِم وَلا بحكِي اللي جُوايا بقول فترة وهتعدي وتقلب دُنيتي وَردِي وننهيها بقى حِكَايَه وأرجع بَلدِي من تاني محقق كُل أحلامِي فِ قَعدَه جميله مع أهلي وبنتي ووَلَدِي يندهلي ويحكُوا حِكَايَه وَيَّايا يا قطر الغُربة مَ كِفايه تِعِبنًا خُلاص وبكفَايَه

## الفَقْر دوا

ناس كتير الفَقْر لِيها دوا شاربينه ببلاش أصل الفقير لو إغتنى هَيذِل كُل الناس رَبِّكْ يا وَلَدِي ليه حِكَمْ إنت متعرفهاش ولا كُلْ مَنْ لِبِس عَبَايَه بَقى عُمده ولا كُلْ مَنْ كَلْ كَبَابْ ابن ناس كُلْ الحِكَايَه فِ الرضا تِسد جُوعَكْ لُقمَه حَافْ

ويضر إيه برد الشتا مَع جسم سَاترُه لِباس ياما خَلْق رَاكبه هَامَر والقلب منها سللم نمر وياما خَلْق راكبها إلهم وتشوف وشوشها دَهَب والماس كُل الحِكايه فِ الرضا ولا إنى أسمع كلام الناس متقولش یا ابنی لیه کدا؟ إنى اتولد فقري بالشكل دا دا الفقر دوا علاجه ببلاش سامع كلامي يا وَلَدِي وَلاَّ ضَارِبِها طَناش

# الدَّم رخِصْ

الدَّم رِخِصْ بَقى مَيَّه كل يوم .. نِصْحَى نِقُوم شايلين ضَحِيَّه من زمان من سنين ف أي شرع وأي دِين حَمْل السلاح يستوجب قضِيَّه ذَنبُه إيه ؟ ذَنب مين؟ إنه يموت ويسبيب يتيم يبكِي يا عيني راح ابوه وامُّه بتلطم تُصْرُخ هاتوه نفسي اشوفه ولو شويه

ليه العداوه ليه الخصام ياناس كِفاية والله حَرَام ليه بقينا نِحِب الأذيه ؟! يلا نبدأ بالسلام دا احنا دِينًا دِين سَلام يلا نعقل نفكر شويه يلا نِرمى مِنَّا السلاح ونقولها حَي على الفلاح لا آلِي هَشِيل ولا بُندُقِية دا الدم غالى والله أكيد یا إما نعقل یا نِلبس حَدید هي دِي كل القَضِيَّة دُنيًا وأخرة وَعد ووَعِيد والنار بتصرخ عايزه مزيد يارب سَلِّم بَتوسَّل إليك صبح وعشيه ترحَم عِبادَك مِن عَذابَك ببركة كتابك ومُحَمَّد نبيًا

### إوعك تضعف

إوعك تضعف يُوم وتسلِّم عاند نفستك يلا وكمّل كُل أحلامنا هتبقى حَقيقَه عَدَى كِتير باقى دقيقه ليه بتتشائم كِدا م الأول ؟! لازم تِلبِس حَاجِه مِن تُوبَك تمشى معاك بس يا دُوبك واحده بواحده تبقى الأول بكره وبعده الخير هيجيلك أحسن وأفضل من عِبنوًل إ

## هِيلا هُوبًا

شايلاك يا هم فوق راسى ماشية على باب الله بفجلي وكرّاتي أكلها بالحلال ولا أتذلش لواطي يا ما دَقّت ع الراس طُبول ولا حد بيواسي وأديني عايشه بين فِجلِي وكُرّاتي مكتوبلى وراضيه بالمكتوب والقلب عُمرُه ما كان عاصي وأهو دُنيًا ماشية وأنا فيها ماشية بتعلم أماشي يلا سلام هما يومين والكل ماشي ....

#### یا مصر

لابسه ليه تُوب الحداد إخلَعِي يَلاً السنواد عَرَّفِي كُل الولاد الشهيد ف الجنَّة حَي حَقُه بُكرَه بَرضُه جَي راح نجيبه بإيد الشباب اللى يقتل شناب زيه يحرم إبنه وأمّه مِنه اللَّعنَه لِيه في سئنَّه وكِتَاب لابسته لِيه تُوب الحداد والشعر منك أوئه شاب

إللي خَان دَمُّه وِلَحمُه اللي باع دينه وعرضه خُسَارَه فِيه حَتى العِتَاب لابسه لِيه تُوب الحِدَاد إخلَعِي يَلاً السنواد كُل يُوم لو مات شهيد مصر وَلاَّدَه أكيد راح نِطَهَّر كُل شِبر في إيدين الكِلاب إخلَعِي يا أمَّا السَّوَاد فَجْر بُكرَه أكيد جَايلنا يُنشُر الحب مَ بينًا نبقى فَخْر لِلولاد

## ضِحكَايَه

مسير الحي يتلاقى ونتحاكى ونتشاقى وناخد بعض بالأحضان ونرجع تاني زي زمان تِشيل أحلامنا كُبَّايه وسبتي تفيدة تجمعنا من غِير مَ سِيدي يسمعنا جايبه فِ إيدها بَطَّايه وسنفره جميله منصوبه عليها إلعيله مبسوطه بنتقاسِم في بتَّاوَه

مِسير الحَي يتلاقي أعَز الناس بَقُوا فِ غُربَه تعِبنًا يا ناس مِن الفُرقَه يا دُنيًا خَلاص كِدا كِفَايَه مِسير الحَي يتلاقَى وترجع تاني لَمِتنا وتجري علينا ضحكتنا بتِتكَعبِل ضِحكَايَه فِ دِي حِكَايَه ِوِوِو**مِسير الحَي يتلاقَى** ونتحاكى ونتشاقى

## صُغَيِّرين

السنعادة مش بالسنين وَلا دَا رُفَيّع و دَا تِحين وَ لا دَا إِبن مِين ؟ ودِي بنت مِين؟ السَعَادة ضحكِتين شايف البرراء ف العنين؟ شايف إلايدين الفرحانين؟ نِقدر نقول دُول تَعبَانِين؟! يبقى منهم غيرانين !! الشعر شاب واللبس داب بَس القلوب لسَّه شنباب

تدى دُروس لِلمُحبَطِين إنت قادر وإنتي قادره يجمع ما بينكم دبلتين أصل السعادة مش بالسنين شايف الحنان مِن غير كلام يروي إلعيون إلعطشانين رَغم الهدوء رَغم السُّكَات إيد بتدي والتانيه هات زَي الملايكه منورين بالبراءه والبساطه واللسنان معجون شياكه تِفضَل قُلوبِنَا صُغَيَّرين

## عَهْد الطفولة

لَمَّا وعِيت عَ الدنيا وجيت قالوا عَليًا زينة البيت دِي الشطورَه والأمُّورَه أيوَه ملاك مَاليَه الصُّورَه كَتَبوا عَنِّي كمان حواديت يسلكم بابا وكمان ماما إتعلمت منهم ياما كبرت معاهم واتربيت أحلى أيامي في مدرستي بین صَحْبَاتی وَیّا استَاذْتِی معايا كتابي قلمي وكَرَّاستى عُمري ف يوم مِنهُم ما شُكِيت

احْنَا الضِّحكَه حَاضْنَه الغنوَه أحلَى اصحَاب فيكى يا دُنيا مهما تقولوا عَلِينًا مَجَانِين هَنفضَل وَرْد مَالِى البساتين عصافير بتغنّى في عالم تانيه عَهْد البراءَه والطفوله تُوب جميل مَعْمُول عُمُولَه ومهما يجري بيًا زماني لِسَّه عَنْدِي بَرضو أمانى لِسَّه فاكرَه أنا سننه أولى لَمَّا وعِيت عَ الدنيا وجيت قالوا عَنِّى زينة البيت دِي الشطورَه والأمُّورَه كَتَبوا عَنِّي كمان حواديت

## رفقا بأبنائكم

يا مَحلى العِيلَه لمَّا تكون أم حنونه وأب حنون بین اخواتی کُلْ حَیاتی تضحك لينا شَمس الكون بَسْ حكايتي شويه غريبه عایشه حیاتی کأنی وَحِیده حتى عيونى ما شايفه النوم مین تسمعنی مین تفهمنی ؟ مين أحكيلها ع ال شاغلني ؟ نفسى ف أخت بقلب حنون أشيل أسراري جُوه عِيونها

أحكي وأشكي أتعلم منها أكيد الدُّنيَا بينا جميله تحلى اللَّمَّه وّيّا العِيلَه حِلوه بيوتنا لمّا تكون صافيه قلوبنا لا حِقْد ولُوم نلاقى الضحكه طارحه سننابل زَي الورده ف وسط جَناين حِلوه جميله شكل ولون عَوِّد نفسك تبقى مَلاك أوعى تعيشها ف يوم فرعون

## المَحكَمة

لمَّا بتاكُل ورث إخواتك وتكتب أرضك بإسم مراتك فاكر إلدنيا ليك هتدوم يمكن تصحى ف يوم ما تقوم مين هَيشِيلَك غِير إخواتَك ؟ مال الدُنيا كُلُه يغُور بس تعيش سليم مستور بَطَّل هَرشْ يَلا فِ رَاسنك مِيّه متين هتعيش ألفين ؟! طيّب بُكرا رايح فين؟ مَيِّت مَيِّت إنت وناسنك

مين يشفعك مين يحميك ؟ مین یدعیلك یبكی علیك ؟ هتبكى مراتك ؟ ولا حتى عيالك !!! تِبنِي عَمَاير تِبنِي قُصُور لكن إلقبر مَطْفِي إلنُور نَوّر قبرَك صِل أرحَامَك شايف نفستك غلبان مسكين والكُل عَليك ساحب السكين كُمِّل فِيلمَك عِيش أوهَامَك إمّا الجنه وإمّا النّار إنتَ لِوَحدَك يَلا إختار طرقين قُدَامَك

## تُوب العُرُوبَة

تُوب العُرُوبَة التقطع والجسم بات عِريان مَفيش شُجَاع يُستُره سايبنُه ليه يتهَان؟ دا القلم قال كِلمِتُه قَبِل أي لِسان لَمَّا الشِناب تِتحِنِي الضهر أكيد هيبان وإلدنيا حالفه لتشكي يوم القيامة كُل جَبان دي الصلاة لازم تأديها

مهما تكون تعبان واللي مَ يغِير عَ العِرض مَلْعُون فِ سُنَّة وفَرض تُوب الشهامة والبطولة بَقى بس فِ الأفلام تسبب أبوك تقتل أخوك تعادي أهلك إللى جابوك ع بعض بس نِبان شُجعان يا دُنيا لِفي بينا زَمَان هاتی جَارِي جَنب دَارِي هاتي غِيطي جَنب بيتي كُنَّا حَبايب أهل وقَرايب الكلمة حِلوة من غير ضرايب كُنَّا زَمان أهل وجيران

أما اليُومَادِي قُلوبنا رَمَادِي نسينا نِرمي حَتى السلام

#### ليه ساكتين ؟

ليه ساكتين ع الظلم يا ناس ليه بنتذل وبنتداس ؟! ليه حابين نفضل قِلَّة زَى المَيَّه فِ قعر الحَلَّه جدي وجدك كانوا أبطال لامتى هنفضل إحنا عيال الجُبْن مَالينًا بَرَّه وجُوَّه ضاع الأقصى وضاعت الشام وإحنا بقينا بس كلام نِرغِي ونِحْكِي نُفْشُر نِفتِي نِعِيش بطُولتنا فِ الأفلام

فين عُرُوبتنا الحلوة زمان ؟! كُنَّا أخوات كُنَّا حَبَايِب ليه إتقْطُّعنا سَبعين مِلَّه ؟! دول الشيعه ودول عَلمَان وإحنا السئنَّه ودول إخوان اصحوا وفوقوا يلا ناس الكُل علينا عَدّى ودَاس حتى اطفالنا ضاربين كُولُّه اصحوا وفوقوا يكلايا ناس ليه راضيين بالذُّل لِباس دا عُمْر الفاشل ما يروح الجنَّة

#### شمس الخيانه

كل يوم تلبس جديد ليه رضينا بالاهانه للصغير والكبير؟ ليه سيوف الحق صَدِّت والعتاب مبقاش يفيد؟ جاوبوني ليه الدُنيا باخت؟ حتى القلوب كبرت وشاخت أما الضماير ماتت أكيد! لیه بنخدع لیه بنکدب ليه بنسرق ليه بنقتل ؟ رجعنا تانى زمن العبيد

الناس لباسها حرير وأساور وإحنا لبسنا ف الحديد ناس خيالها فوق السحاب كل خطوه ليها حساب وإحنا خيالنا كفته وكباب فيه كام قميص جوه الدولاب فيه كام خروف ليوم العيد؟ دا عُمر الغبي مَ يكون سعيد يلا نبنى لينا حضاره ونعيد تاريخنا للصداره بن ماجه بن سينا وبن الوليد ف العلم كُنا ف الطب كُنا ف رياضه كُنا ف الفن كنا ولما نمنا هُنا وهنا

بقينا مذبلة التاريخ بقينا ماضي يشتم ف حاضر الكل يؤمر ونقوله حاضر كنا ساده أيوه يا ساده بقينا أمه ف تُوب عبيد

### الجو برد

الجو برد بس الأخُوَّة بتدفَى لو فيه مَحَبَّة جامعه الأحبة لُقمَه واحده بتكفِّي لكن العداوة وشغل الغياوه لو مال قارون والله ما يكفِّي إفرد لاخوك تحتيه جناحك دا دمك ولحمك وتوعم كفاحك الجوبرد بس الأخُوَّة بتدفِّى لو فيه محبة جامعه الأحبة تفرق ایه؟؟؟ أنام جعان ولا متعشي

ياما ناس ماليه البطون أما العقول مليانه مَحشِّي أكلها دُقُّه بالحلال ولا اتفشخر بفينو وشيبسي ياما ناس عايشه ببلاش صابره وراضيه أهى ماشيه وخلاص ولا تِقلِب ف يوم تاكسي بالمحبة تزيد محبة لكن الغباوه تكره أخُوك ولو (لونيل مِيسِّي) ما الجو برد بس الأخُوَّة بتدفِّى

#### البيت القديم

فيه حَكَايا بالسنين الصئور والذكريات اللعب والكرَّسنات كُل لَحظة ليها ذِكرَى كل حلم كان لبُكره شابك بطين ف بيتنا القديم الدموع حاضنه السعاده قالتلى أُمي يوم الولادَه كُل الحبايب متجمعين ف بيتنا القديم

بسند بإيدى عَ الحِطان بين الكراسى والببان بَحبي وماشي مع السنين ف بيتنا القديم أمى وابويا كانوا إلأمان أختي وأخويا نبع الحنان دايماً شايفهم متبسمين ف بيتنا القديم الاحترام قبل إلعباده هوَّ دَا معنى السعاده أصل الربايه دنيا ودين ف بيتنا القديم البراءه ساكنه العيون أكْل الحلال مالي البطون

## عيشنا دايماً طيبين ف بيتنا القديم مليون حكايه تخلينا لسه صئعًيرين

# أُمِّـى

بسم الله بزين بيها حروف البدايه اليوم هغني وهاحكي معاكم اجمل حكايه عنوانها أمي أمي أمي لو مره واحده مش كفایه بحبك يا أم العنين الدبلانين بحبك يا أم الايدين الشقيانين يا أم الولاد ويًا البنات ربتينا من غير عصايه ربتيناع الاحترام

لسه فينا ريحة زمان بدرتى فينا حَبْ السلام سَلَّيتي مِنَّا شُوك العداوه يا ورده طارحه سلم وسلام فادره ضفايرك ع برج الحمام أنا حبى ليكي مش كلام ولا كلمة بنقولها ف حكايه بحبك يا عيني يا نن عيني لوابوس ترابك مش كفايه إمشى براحتك دى الجنه تحتك وصى عليكي رسول الهداية وأنا نفسى أنولها ألمس ببانها ولو عجوز سنداه عصابه حبك يا أمى مش كلام

#### دي رحلة كفاح يشهد عليها عَرَقِي وشقايا

# <u>مِتشَكرَّين</u>

على كُلْ صُوتْ جه مِنْ سُكَاتْ مِتشَكَّرينْ على كُلْ صَاحِبْ عَدَّى وِفَاتْ أمَّا إللي كَبَّر مِنْ غِيرِ ما أكتَّر هَعتبرُه مَاتُ المَحَبة مُشْ كَلامْ على بُوست نِصحَى والتاني نناااااااااام

على بُوست هاااااي والتاني سلاااااااام الرجوله يا ابن بلدي تبقى جَنبِي مِنْ سُكاتْ فاكرينِّي هَغْرَق فِ شِبر مَيَّه ؟! أمشي لوحدي تلدَّغنِي حَيَّه لِيه عقُولكُم راضْعَه الأذِيَّه ؟ لِيه خَيالكُم مَعجُون رَزيَّه ؟! لِيه كَلامكُم زَي اِلْوَلْيَّه ؟!

نَقِّطُونَا بالسَّكات رَمِيت طوبتكُم في المُهمَلاتُ مَبِقيتش أبكِي على حَدْ فِيكُم الحَي عَندِي زَي اللي مَاااااتْ

## فِ قعدة نت

جَتنِي رسايل مِنْ كام بتْ إللى حبيبها زعلان منها وإللى أخُوها باع شقتها واللى خطيبها كمان بيخونها مِنْ عَ النت ليه أخلاقنا زَي الزِّفت؟ ليه ضمايرنا ماتت فينا؟ سِبنا شِيطانًا يتحكّم فِينا ريحِتْنَا فاحِت زي إلِمش طب إف وإف طب إف وإف

فين النَخْوَه فين الغِيره؟
اخلاقنا سَابِت عايزه خَمِيره
البِسْنَا قِناع بمليون وِش
كفايه خِدَاع معجون غِشْ
اِدِّي حَنانَك لامُك واخُتك
خُدْ فِ احضَانَك زوجتك وابنك
كفايه تَخَلُف..عايشها طُرُبش
وف قعدة نت
بس كفايه مَهكمِلْش ....

### كلمتين وبس

لكل راجل من ضهر راجل والباقى هُسْ لِمْ شَرَفَك لِمْ مَرَتَك الرُجُولة مُشْ شِناب وبس بارملي شنبك مغطى بيه ياخوي حنكك يا اخى غطى خيبتك شوف مقص لتعيش حمار لعب وقمار وسايب المدام شغاله دس انفخ خدودك حَمَّر عيونك

قولهالها وش إنتى طالق بالتلاته إنتى وأهلك كمان تلاته كفايه غِشْ كنت راجلك كنت عرضك اما انتي كنتي غِشْ كنتى خاينه م البدايه عشتي خاينه للنهايه خلتيني أهبل طُرُبش يلا غوري يا بت الكلاب شُمَّتِي فِيًا ولْد الكلاب خلتی قلبی فردِه کاوتش

# حَلِّل قِرشك

راعى ضميرك حَلِّل قِرشك لنار الأخره تولّع كرشك مهما يكون الأجر ضعيف هتلاقى غموزك جوه رغيف رَبِّكُ عَالِم برضو بحالتك دا مال الدنيا مش هيدوم والعمر بينقص يوم ورا يوم ازرع ورده تعطر سيرتك قوم من بدرى صلِّ فروضك خلى الضحكه عنوان يومك ارسم عَالَم حلو جميل

طفل برئ حاضن النيل لوّن حلمك يلا بريشتك إغسل وشك م الأوهام مش هيفيد أنا باخد كام ؟! أشكر ربك إرضى بحالتك أوعى تزوغ يوم من شغلك ليزوغ الخير من بيتك وأهلك هتلاقي الفقر بيجري وراك حتى ف نومك يقلق راحتك

# رُزْ بلاستك

رُزْ بلاستك على تَمويني قال مُستورَد وفلبّني يادي الحوسنه يادي اللّوصنه حتى اللحمه طِلعِت صِيني صَوَّتِي بِامَّا أَنَا مُتْ خلاص هاتى شُوال قوام غَطِينى كيلو القوطه ب10 جنيه من شهرین کانت بجنیه أه يا دُنيا مِطلَّعه عِيني أكل إيه ؟ وأشرب إيه ؟ ما أنا غلبان مُشْ واد البيه

اشكى وأحكى تقولوا ليه؟ كُله كويس كُله تمام شَخَّر إنت بَسْ ونَام اَ طب فَرِّجني ياخُوي وَرِّيني لمَّا الفرخَه تصبَح حِلم أشم ريحتها يادُوب ف الفيلم يبقى كلامكم هيعشيني؟! صَوَّتِي يامَّا قَوام غَطِّيني أردب القمح بتسع ميات والله ف جيبى جُوز جنيهات لو أشرب مَيَّه ما تكفيني صَوَّتِي ياما قوام غَطِّيني لصبغ شعري وأبقى فلببيني تنادی یا وَلدِی ارطناك صِينِی

# مُش هَاكُل لَحْمَه

إسنبوع واتنين أوَفَّر مِيَّه وَلاَّ مِتِين أكِيد مُش امُوت أهُو يُوم وِيفُوت ونسيب البَقَرَه لابن البيه يَاكُل يشبَع بَطْنُه تفرُقع يحَلِّي كَمَان بجَاتُوه سِوَاريه وانتَ يَا فَقْري يَا ابن الفَقْرِي

بَاصِص فُوق دَايماً لِيه ؟! صِحْن بِسَارَه وَيًّا خِيَارَه أكْلَه بَسِيطَه مُش عَايِزُه شَطَارَه تِبْقَى حصَان فارد رجليه حَلِّة عَدْس تكبِسْهَا كَبْس وَيًّا بَصَلَه وِوَاحْدَه خَس تِتمَطّع يَا ابنِي تِهِد البيت يَلاَّ نِدَبَّر يَلاَّ نِوَفَّر

يَلاَّ نِحَوِّش صَدَّقنِي هَنِقدَر وِنسِيب اللَّحْمَه لابن البِيه

# كُلُّه كُوَيس

كُلُه كُويس كُلُه تمام أدينا بناكل نشرب وننام ولا فيش حد بينا جعان صباع الفينو بقي بجنيه واللحمه بشوفها ف الأفلام كله كويس كله تمام أكلت امبارح فرخه كبيرة والرز اتنتور يملا حصيره وأما صحيت طلعت أحلام حتى مراتي سابت البيت قالتلی یا فقری دا انت جعان

روحت أجيبلى لوفه وفوطه سألت يا عم .... دولا بكام ؟ قالی اسکت یا ابنی وامشی استكت يلا بلاها جنان امسح وشك بالجلابيه نشف جسمك بالجورنان كله كويس كله تمام شريط الريفو بعشره جنيه ولا فیش قطرہ لیکی یا ودان هشكى لمين ؟ , واحكى لمين ؟ أنا ببكى لوحدى ف الحمام حتى لحافي منى اتفسَّخ اغطي راسي رجلي تبان خدته معايا تنجيد بالماكنه

قالي يا ولدي الزَقُه بلبان ليه بنعضعض إيد بعضينا ؟! نِسْلَم نِسْلَم والله جدعان كله كويس كله تمام

#### مساء التين

مساء التين ومرار العيشه دا أنا جيبي شطب فَكَّه وتحويشه ودماغي بتلف من شرب الشيشه فين أيام أجدادنا زمان ؟! زمن القرش والتعريفه كان القرش يملا العين ونفوس الناس راضيه مليحه كيلة الغَلَّه تملا الحَلَّه ورطل السمنه يملا صفيحه أما اليوم تدفع دغري يا إما تغور

تمشي يا عيني بجناح مكسور تقولش يا واد عملت فضيحه أصلك فقري بوزك ناشف بطنك فاضي مزرزر سافف مش لابس الزفره والتلفيحه لازم تكدب زي الناس تجيبلك ماكنه من غير امواس تلبس هدمة مكويّه نضيفه والله زمان

جدي وجدك كانوا حبايب لو شافوا فقير يعبوا زكايب كانوا عايشينها بنيه سليمه جابولنا أحفاد تقولش قراد خلوا الدنيا بوش غُراب أه يا زمان بقولها كمان خليت البغل بقى له قيمه

# بخ

بَلاش تِتخَض وخَلِيك رَاجِل عُمْر الرَهرَطَه ما تجيب رَاجِل جاوب يلاً فِ جيبك كام..؟ ولاً مِفَلِّس زَيِّ ي كَمَان..؟ مَالك يا ابني عَاوج بُوزَك راكب الفقر

مطلطل شئوزك خَلِّيك عَايش زَي الناس تعجن تقلب دُنيًا متسواش معاك هتعيش لو برضو مفیش رَبِّك أصلُه مَ بينساش صلى فروضك يلا ودعيله إرفع إيدك لفوق واشكيله دَارِي دُموعَك عَن عِين النَّاس أُوعَك تِضعف أو تِتذَل عُمْر النَّخل مَ يطرَح خَلْ عُمْر الدُنيًا مَ هَتدِيك ِ بَدَل الشُوك وَرد وفُل

# خَلِيكْ جَدَعْ

رغم الشقى رغم التَّعب وإن الهموم جايبه الرُّكب هتلاق*ي* حلم بيتولد هتلاقى ضحكة بتتوجد بين الشفايف بتعاند الوجع ورغم الوجع هتلاقى فينا حَدْ جَدَع حاضن إيديك خايف عليك إنك تُقَع ما القلب أبيض مُشْ قَلب أسود كُلُّه بُقع

ياما ناس بتحب ناس ولو بِتُوب مَليان رُقَع أصل المحبة مُشْ كَلام ولا إني أصَبَّح واقول سلام كُلْ الحِكَاية خَلِيك جَدَع

#### دق القلب

لمَّا القلب يدق بجد يبقى أكيد وقع في الحب قلبى اختارك انت وبس امتى تحن عليًا تحس بصحى وانام أفكر فيك ليل ونهار خايفه عليك نفسى انا وانت نبنى العِش لما القلب يدق بجد يبقى أكيد وقع في الحب الكروان ويًا العصفورة جنتل مان خطب الأمورة

والله محلاها سيرة الحب
اسأل قلبك أنا ليه حبيتك
شايلاك في عيوني كمان خبيتك
زرعت في قلبي بستان ورد
وحالفه لجيبه قدام بيتك
امتى هتفهم يخرب بيتك
انت يا واد والله حبيبتك
ولمًا القلب يدق بجد
يبقى أكيد وقع في الحب

# خَلاصْ هَتْجَوَّز

هَبْرُم شَنبَي وأنجد كنبي واشوفلي عروسة هَبْلَه ومَتْعُوسَه تغسل هدوماتي وتِنَضِف خَلَقي معاها اتْجَلَّع أضْحَكْ واكركع ويجليلي مُتَخَلف قال ضَهرِي وسنندي يقولي يا بابا

إبعد عن ماما وه وه وه اختشي يا وَلَدي هع هع هع هع خلاص هتجوز مَبِقتِشْ أَحَوِّشْ دُقِّي يا مَزِيكا أنا هَرْقُص بَلدي زَ غرَتِي يا تَفيِدَه وانتي يا بَكِيزَه هاتي خالتي حفيظة تِهَديِّ حَمَايَا دا راجل نَكَدي خَلِّي الليلة دِيّا تِتِم

وأقعد ع الكُوشَه خلاص واتلَم لأرجع ف كلامِي واحْلِق شنَنبي

### عيد سعيد

عَ الصغير والكبير انشروا الدنيا مَحَبَّه فرَّحُوهُم حَبَّه حَبَّه القريب والبعيد عيد ستعيد يلاً نِسأل عَ الحبايب اللي حاضر واللي غايب وَزَّعُوا يلاَّ العِيديَّه وَ من جنيه ولحد مِيَّه شخلل الجيب إل عَندَك راح اجيك حد عندك

نسعد القلب الحزين عيد ستعيد دَخَّلُوا الفرحَه بيوتكم إطردوا الخزن اللي بينكم البسئوا الطقم الجديد عيد ستعيد عَ الحبايب والجيران خَبَّطُوا كل البيبان صَحوا يلاً كُل نايم عِيد سَعيد على كُل صايم بالمحبه حَبَّه حَبَّه العدو يصبح حبيب وعيد ستعيد

## مصر نَادِت

مصر نادت قوام وقالت فِين ولاَدِي ؟ رَدِّ السَّادَات كُلُّه يُهُون عَلَشَان بلادَي بِالدَّم أَفْدِي وِكَمَان بِرُوحِي لَو حَتَّى أَمُوت تِعِيش بِلاَدِي دَه احْنَا رجَال أَحْفَاد جَمَال عَبَرُوا القَنَال هَزَمُوا الأعَادِي إهْتِف يَا مَصْري اللهُ أَكْبَر يَا كُل مَصْري مِدُّوا الأيادِي رَجَعْنَا سِيْنَا الله حَامِينَا دَه احْنَا أُسُود فِي وش الأعَادِي حَمِينَا الحُدُود وَالله حَامِينَا يِهْتِف فُوَادِي تِهْتِف بِلاَدِي اللهُ أَكْبَر عَاشِت بِلاَدِي اللهُ أَكْبَر عَاشِت بِلاَدِي

### ملاك الجنة

نامي واتهني اطلبي واتمني يا ملاك الجنه قولي لبوكي واحكي لأمك بكرا معايا راح نتهنى ربي اختارني من بين صحباتي قولت وداع لاهلي وأخواتي

افرشوا اوضتي ورد وحنه اوعوا تقولوا رضوی دِي ماتت ذكرى وعدت مرت فاتت أنا روحي بتسبح ف نعيم الجنه خَلُّوا عنيكم على أولادكم حتى معاكم جُوَّا بيوتكم ضاعت الرحمه ماتت الذِّمَّه

### إعتبره مات

مُش قادر أكتب ولا أقول كلام وقلمى شطب زعلان كمان رافض يكمل معايا حكايتي مش ضعف منه ولا جبان لو دا أبوك ... ترضاها ليه ؟! ناس تنام عل الحرير فارده جناحها عايزه تطير والفقيرع الأرض نايم مش لاقي حتى الحصير والشوال عَلَّم في راسه

مات خلاص فينا الضمير والعصايا في ايده تعبت حالفه ما تسيبه وحيد نفسی حد بس یجاوینی راح لفين منا الضمير؟! شعره شاب وإحنا نهينه ع التراب نايم بطينه نفسى أعرف متعري ليه؟! مفیش شجاع فاهم فی دینه یشیل کبیر فی نن عینه يحن عليه ؟! بلاش عتاب... ليا يا قلمي قولت هسکت ورجعت تکتب كتبت لبه؟!

# العِلْم ثُور

قول لولدك العلم نور بس رَبِّيه في البداية سايبه ينطح كأنه تُور دا العلم وَحْدُه مش كفاية ويفيد بإيه كتر العلام واللسان قليل ربايه يشتم يلبَّخ بالكلام مَرضَعش أصلاً إحترام ولا عاش معانا زمن العصايه زمن الطفولة كانت رجوله لعب الأدب دور البطولة

مش تبجَّح ولكتبك تلقَّح وتجري يا نُوغَه هجبلك بابايا يشخط وينتر تقولش عنتر العيب مُش عليك العيب مُش عليك العيب ع اللي رَبَّى مِ البداية دا الأدب قبل العلام هو دا شرط الرباية عَلِّمُوهُم الاحترام عَلِّمُوهُم الاحترام تتعدل باقي الحكاية

## یا مراکبی

عَوِّم عَوِّم يا مراكبي جنيهَك الفقري غَرَقنِي مش قادر الحلو ينصب طُولُه ولا قادر انا حتى أطُولُه مِشْلَّح مِنِّي وبيجري عَوِّم عَوِّم يا مراكبي للموجه الجاية تغرقنى وصلنى لبرَّك رَسِّينى لو عندك ستمكة تواسيني دا أنا دَمِّي فاير وبيغلي

عَوِّم عَوِّم يا مراكبي اللحمة بقيت للزينة والفرخة جاية تِعزّينا والفاكهه محرومه علينا ما جنيهنا شَلَّح من بدري عَوِّم عَوِّم يا مراكبي إدِّيني دولار أستر نفسى او هاتلي يورو يفرفشني الله يجازيك يا كاسفنى الكل بيمشي وأنا بَحبي عَوِّم عَوِّم يا مراكبي

# زِي الحَنْش

خليك زي الحنش ميحبش لاذيه ولو عدوك ليك كمش الدَّغُه كَمَا الحَيَّة ما الطيابة معدتش تنفع والكل قاعد يُفشر وينخَع ولو قِتِلْت مَلكش دِيًا عايشين ديابة بتعض الغلابة ولما تسامح تبقى هَفيًا الطيب سنهن

والأهطل بقى عَمْ ما العقل زينة ودي عقول غَبيًا عامله فِردَه وعقولها خُردَه والله كمان مِصَديًّا رافضه الكلام رافضه الحديت حابه المشاكل تقيد حريق عايزاك تموت وتفضى البيوت وتكون النهاية إنت الضحيّه لا كفاية لا حرام لا كفاية مفيش خصام يلا نبدأ بالسلام

يلا نُرجُم الشيطان معدش فيه بينا هَفيًا

# زَي القَمَر

شايفين حبيبتي الله عليها زَي القمر خطفتلي قلبي من بين البشر سحرتني وربي دي عشقي وحبي وياها يحلى السهر ضحكايه حلوة وحكاية حلوة بسمة وغنوة لو هوصف جمالها يغار القمر

بحب یا بنتی بحلفلك بربي ويشهد عليا الطيرع الشجر سحرتني يابا وأنا مغرم صبابا خلتني دايب زي الحبايب وفي قلبي شايل ألبوم صور يلا تعالي يا عمري وليلاتي ميلي عليا أحكي حكاياتي زي القمر



### <u> کنین</u>

رَغم الفراق رَغم الأنين لسه لیکی ف قلبی حنین مش قادر أنسى ضحكتك لمسة ايديكي والعنين روحتي فين سيبتي قلبي طير حزين إتواعدنا نكون حبايب وافترقنا مرت سنين ويًا الليالي واتسرقنا مبقاش يفيد دمع العنين

روحتي فين هان علیکی حُبی وحنانی قولتي هرجع وبعدتي تاني صدقینی مش ناسیکی قلبي أصله مش أناني كنتي شمسي ويّا ضِلي كنتي حُبِّي اللي فاضيلي ليه قسيتي ليه نسيتي ف لحظة بعتي ما اشتريتي جاوبینی یلا روحتی فین؟ أنا مش ناسيكى وف قلبی شایل حبی لیکی مدى إيدك انا ماد الإيدين مدى إيدك خليني أسلم

لو من بعيد شاوري أسلم أروي عيوني العطشانين الأاأأأأه حنين حنين حنين

#### السيرة الذاتية


\*\*\*\*\*

زكريا ضاحي توفيق محمد مواليد / القوصية / أسبوط يعمل معلماً للغة العربية - ليسانس دار العلوم / جامعة المنيا // دبلوما عامة في التربية ـ جامعة أسيوط // ملقب بشاعر الغلابة حاصل على أوسمة ذهبية في مجال شعر العامية من: 1- مؤسسة عبدالقادر الحسيني الثقافية 2- مؤسسة ضياء الجبالي للثقافة والفنون 3- نقابة شعراء مصر تحت التأسيس 4- فريق بكرة أحلى لرعاية المواهب للتواصل مويايل / 01093898393 للتواصل فيس بوك / زكريا شاهين

#### محتوى الكتاب

صفحة	المحتوى	٩
2	بطاقة الكتاب	1
3	إهداء إلى	2
4	بكره أحلى	3
6	يارب	4
8	وقت الشدة	5
10	قطر الغربة	6
12	الفقر دوا	7
14	الدم رخص	8
17	إوعك تضعف	9
18	هیلا هوبا	10
20	يامصر	11

22	ضحكاية	12
24	صغيرين	13
26	عهد الطفولة	14
28	رفقا بأبنائكم	15
30	المحكمة	16
32	توب العروبة	17
35	ليه ساكتين	18
37	شمس الخيانة	19
40	الجو برد	20
42	البيت القديم	21
45	أمى	22
48	متشكرين	23
51	ف قعدة نت	24
53	كلمتين وبس	25



55	حلل قرشك	26
57	رز بلاستيك	27
59	مش هاكل لحمة	28
62	کله کویس	29
65	مساء التين	30
68	بخ	31
70	خلیك جدع	32
72	دق القلب	33
74	خلاص هاتجوز	34
77	عيد سعيد	35
79	مصر نادت	36
81	ملاك الجنة	37
83	اعتبره مات	38
85	العلم نور	39



87	يامراكبى	40
89	زى الحنش	41
92	زى القمر	42
94	حنین	43
97	السيرة الذاتية	44
98	محتوى الكتاب	45